

四庫全書

集部

欽定四庫全書

集部

貞素齋集卷

三至五

詳校官監察御史臣劉湄

中書臣劉源溥覆勘

總校官編修臣王燕緒

校對官修撰臣戴衢亨

謄錄監生臣沈芬

欽定四庫全書

貞素齋集卷五

元 舒頔 撰

辨

石印辨

郡志載油潭石印方平有文其出沒係縣令廉否宋蘇
頴濱崔正言宰邑時嘗一見後沉於沙世奇其說而傳
之予嘗怪而疑之戊戌春三月縣令理君天章亦喜其

事拉予往觀以究其實比至目其狀癡焉頑精橫臥溪
澗長五六尺許高如其半其色若鐵皆積小石以成磊
砢錯愕無甚奇者則郡志與傳皆誣甚矣人之好怪也
嗟夫自天地即有此石有是縣然後有令令之貪廉者
不知其幾無乃蘇崔廉而起石之靈耶抑石素靈知令
之貪廉而為之出沒耶石其有靈繼蘇崔者果無其人
乎世有石知貪廉而時其出沒則人不若甚矣寧不愧
乎其好怪而昧夫理又復符其說而筆之於志識者詎

庸信唐柳州記零陵石鍾乳刺史貪戾邦人病且給
刺史明潔穴人以乳復告彼以給而此以誣偶合一機
耳今有人聲譽洋洋在上海內稱頌不置口洎見不副
於實者往往若是豈惟石哉且豐其祿巍巍在位去茲
不遠矣予將火圖經燬其石絕其誣使後之人無復疑
碑

蘇文定公祠碑

吾邑之西隅有亭曰翠眉不知其何人作也前則二小

山對出自亭而望嫵然如眉地勢平行林木蒼蔚元豐
末蘇文定公為縣愛其幽清時往遊焉賦詩其上公去
而邑人思之即亭為祠中更黨籍禁錮之餘重以寇攘
之厄井邑蕩然公之遺翰了無在者紹興中飾縣廨一
堂名曰景蘇後令曹訓核刊公在績溪所為詩三十六
篇於石而摹公像於亭歲月寢久棟宇弗支淳熙十年
公曾孫秘閣修撰諤為江東路轉運副使按行邑中來
拜祠下出俸錢付縣吏修之經久亦頽矣至前江淮太

守高昌達理瑪實哩侯天章當艱危之際出處未嘗關
於心來宰吾邑下車初詢父老曰吏斯土者孰賢僉曰
眉山蘇公子由為吾邑之賢令也次日謁於祠嘆感其
剝落輒出俸泉固將及之召頓作文以為之記又明年
厥土告曰祠已成矣闢亭為四楹得家廟本別繪公像
於中前為軒楹以面兩山後為舍以待遊者以公之愛
其處規制仍舊不敢侈也夫公之名滿天下而文章誦
於四夷功烈論議具載信史豈須記而後傳蓋績谿在

岩邑間公之為令僅以半載而邑人至今乃不能忘則其道德所加必有樂施而民信者矣雖然公之對制策當仁宗朝已有敢言之氣而幾見黜於有司驅馳州縣不得用於臺閣者踰二十年迨東坡先生以詩得罪公亦坐貶於筠州起而來績谿則既五十矣自是始還曾不數年任言責司翰墨以翼政路而登門下者則向之忌嫉於公而蹭蹬不偶者未足為公嘆也昔公自蜀入京師縱觀河山之雄宮闕之壯上書韓太尉實自比司

馬遷欲求天下之奇聞壯觀以激發其志氣顧以一縣之微一亭之小耳目所寓未厭而樂之何哉公嘗有言曰天下之樂無窮而以適意為悅方其得意萬物無以易之其斯之謂歟今理侯之政惓惓慕公詢民之思以志於公所遊之地則績谿者殆公之鄉也故頓撫民之謠以為祠神之章俾歲時酬公而歌焉其辭曰公之居兮岷峨西懷欒城兮家貝茨翠眉之山兮何足以嬉公之來兮崑崙丘大江注兮九河流翠眉之水兮何足

以遊嗟公遊於天壤兮等於浮漚擾擾萬類兮是惟蜉
蝣撫茲百里兮曾何異於九州剖折獄訟兮亦吾廟謀
不為此棄兮詎為彼留金閨兮玉堂調神鼎兮輔巖廊
朝臨乳水兮暮栖海康榮枯貴賤兮公以為常藐祠庭
兮山之左杉千章兮竹萬箇公之去來兮世莫可期慘
雲車兮斯人是思元至正戊戌冬十月癸酉日記

三賢堂碑

大明洪武紀元四夷卒服中夏來貢遠邇咸期於治然

匪教莫輔於是禮宣聖廟如常禮始創太史徽國文公
朱先生祠公生時婺源居有井白氣上騰者數日故生
而神靈穎悟聰敏特異能言時韋齋先生指上曰天也
復問在上何物先生竒之幼從羣兒戲畫八卦沙上以
指示之少長厲志聖賢之學年十九中進士第主泉州
同安簿累遷知靜江潭州轉兵部拜直寶煥文閣侍講
致仕華文閣待制明年七十有一卒贈中大夫自登第
仕外九任立朝僅四十日嗚呼道其難行也夫理宗實

慶三年贈太師追封信國公紹定改今封謚曰文外氏
祝居紫陽故得專祠祀績獨闕祀前令茲邑者欲作復
輟弗克而就厥志人事不齊士氣荏默適湘中歐困來
蒞政慨言興舉乃撫舊學遺址去縣踰百步許以是年
四月治建堂立像惟肖以門弟子黃公幹蔡公元定配
經營齋廡及門甃石於墀級階於庭垣墉庖湑丹雘塗
堊外內完美禮飽於經術者為弟子師復構文會亭於
後為師友講肄游息之所面陽位亢牕牖明豁山光雲

影飛動欄楹間為一邑壯觀諸士躍然曰文教興乎令
知所本乎嗟乎道之在天下如水之在地中斯道無乎
不在日用動靜語默之間無非道也三代已降周公孔
子出斯道始著秦燔詩書道幾於熄漢興董仲舒云道
之大原出於天當時倡為似是近世儒先方回以為天
出於道學者善之先生繼周程張邵諸君子擴聖賢未
發之蘊奧纘百世之絕學六經四書仁義道德之說子
史百家傳志撰述之言莫不竭其心殫其慮剔抉刮剝

窮天地事物之理測鬼神造化之機判古今得失之由
論議卓然為百世師所謂衣被生靈羽翊斯道扶持世
教先生之功為多大有關於風化也且夫邑有關典而
令不知舉責民鄙夷而不可化是大不然苟不教而責
其不化夫豈民之罪也哉祠成蠲以秋仲舍菜諸生感
令之興舉咸願刻石以頌余亦嘉令從道尚賢於法宜
書然則為忠為孝以之相期於諸生也同寅縣丞邢惓
典史蔣原禮贊其成功云

重建登源廟碑

登源廟者越國汪公之神之祠也公生而岐嶷美鬕髯
好武事以勇俠聞叔父寶觀為隋將深器之當隋之季
也天下大亂高祖起太原受命有唐公秉山川之雄提
三尺奮不顧身柄六郡屈萬衆旂道旄指悉聽號令武
德三年庚辰潛遺其弟宣城長吏鐵佛走長安申款誠
明年九月甲子奉表歸唐高祖以制褒之曰汪華往因
離亂保處州鄉鎮安靜一隅以待寧晏識機慕化遠送

款誠宜從褒寵授以方牧可使持節總管歙宣杭陸婺
饒六州諸軍士歙州刺史上柱國越國公食邑三千戶
貞觀二年入覲授左衛白渠府總軍十七年改忠將軍
行右衛積福庫折衝都尉明年太宗征遼遷九成宮留
守駕還偉其功二十三年薨於長安享年六十有四永
徽三年歸葬歙之雲郎山按是實公四世祖叔舉字鵬
遠宋武帝大明間為軍司馬年九十八卒葬登嶺白楊
坑鵬遠生泰泰生勲明勲明生僧瑩陳文帝天祐初為

海寧令遷郡長史而公生焉嗚呼公負忠勇之氣保塗
炭之民識天命之歸達君臣之義仁知兼該威惠並至
宜其沒而為神廟食百世以祛疾癘以福我民可謂靈
也矣宋累追封至昭忠廣神仁武神英聖王廟錫忠烈
改封昭忠廣仁武烈靈顯王廟之廢興不知其幾復燬
於至正壬辰之亂我朝龍興奄有海隅凡名山大川忠
臣烈士祀典實嚴神乃復唐舊封洪武八年許之長葛
唐侯由弘州來令吾邑甫期政修民化邑以善治稱越

明年夏秋之交績歛俱旱侯即虔告祠下甘澍輒應是
年獨境內大稔民咸曰耿耿神之賜也侯所以致哉未
幾奉旨凡祀典神祇廟宇或敝廢咸一新之侯乃蠲潔
謁祠下致敬環視高下莽焉丘墟遂惻然審諸耆老曰
廟燬久不治則亾祈日慢禎祥弗降為神羞於是無遠
邇咸相與剪榛翳畚瓦礫度材惟奇命工惟良卜日惟
吉衆手並作殿視舊規宏敞壯麗輦飛翼然丹堊煥然
像貌巍然羣峯拱於前一水環其下林木蓊鬱閟幽獻

奇真神明之居也庶可揭虔妥靈況水旱疾疫有禱必
應生養休息皆蒙廕庥庥歷唐迄今七百餘歲綿綿蒸嘗
是孰使之然耶保障六郡民不知兵功孰大焉奉籍受
命掃除姦凶忠孰大焉經曰仁者必有勇又曰未有義
而後其君者神兼有之昔周穆王得八駿西巡樂而忘
歸徐偃王有朱弓赤矢之瑞四方諸侯賓貢者三十六
國其後偃王不忍鬪其民北走彭城武原山百姓從之
者萬餘家偃王卒鑿石為室以祀至今香火不絕漢祖

之興吳王芮以功封長沙光武之起公孫隗囂矜已飾
知卒至土崩南越尉陀奉詔稱臣黃屋左纛俱廟食百
世與公之於唐功烈同其赫弈當時之民祠而祀之者
惟恐弗及況我績邑寶神明桑梓之邦而登源又丘陵
之勝者乎宜其邦人思之愈久而愈不忘也綠照亭在
廟之東俯瞰潭洞虛敞高明修藤古木遊鱗可觀適足
以滌煩慮絕塵想侯皆新之創始於是十一月辛巳明
年四月正既訖士民大享於庭欣然曰穹哉惟休乃相

與請文以勒諸石唐侯名昊字彥昭主簿高彥誠北平人

雲臺遷地重建碑

雲臺觀者方外之士所創之居也肇於唐永泰初其故址在縣南七里每旦望邑大夫必至憚往返之勞也宋寶慶三年改遷于邑之西翠眉亭之左蓋取便於近也朝廷錫額今百餘年羽流二三徒而其教寢微相地者以為龍山無氣八風不停而致若是作興之士再欲改

創而卒無其所嘗以為恨皇帝即位十有一年當至正
辛卯河南寇變明年三月渡江四月突入徽境燬予邑
而斯觀巋然獨存梁棟崢嶸牕戶零落四顧蕭然觀者
一慨而已又明年春二月克復縣治道士王虛中端愿
而嚮道絕茹飲律守是恪予嘗嘉之一日稽首於予曰
觀之不興則其道幾絕即欲遷創擇艱吉良願檀越以
秀野之地布施之予歎而應曰夫秀野則頌之太祖母
與太伯祖宋授忠義檢法千乙公之墓在焉又豈敢棄

而為子方外之居清虛之道場乎虛中請不已迹其心
亦拳拳然於是以西偏之隙地充之廣凡若干丈袤如
廣甲午五月乃辟其地剪其荆榛撤其舊而遷之三清
居正中為屋凡三楹北居真武殿亦為屋三楹工之計
凡三千九百二十緡之費凡三千八百有奇外為山門
三楹若垣墉若廊若方丈庖湑將次為之嗟夫以方外
之士廩無儋石之積囊乏分銖之資一旦成就若此豈
易易哉予孔子徒也以仁義道德之說淑諸人老氏之

所謂道德者云非吾所謂道德也憫其教之將湮乃施以是而俾輯之非求福田利益也求福田利益而施之其如仁義何後之為其徒者思其創之艱能繼其業而興則予家之地亦相傳於無窮也虛中法名椿永授集賢院檄云

曹溪菴碑

凡山水勝概幽寂不與俗混而得名者一切為佛刹菴宇所有予年壯浪跡東南凡奇絕勝概幽寂深窈佳山

水莫不注意登覽寄情其間北歸老田里追憶舊遊殆

不可復若曹溪菴雖不甚宏敞亦山之一小勝者歟曩歲

老屋數椽不蔽風日壬辰燬於兵榛莽不治荒穢尤甚

舒太湖

今安慶路

善知識程善因辟地處據住持辟草萊薙

荊棘為門為堂凡十數楹左泡右湑整然不紊若有為

者之為額曰曹溪蘭若修清淨身作如來供日趺坐一

榻誦華嚴數卷究竟身心航濟彼岸較絕內驚外視規

戒若虛語者不侔初曹氏族盛曰南坡厚積而薄施名

所居之村曰曹村菴曰曹溪立祖禰木主其中歲時祭祀奉先思孝禮也因其姓而演其教宇焉而彰其功德人德而祀其香火世殊事異夢幻泡影殆不我誣今曰蘭若釋氏以為閒靜處世有託閒靜而混污濁絕葷酒而不忘嗜慾者於善知識匪若也雖然太湖為淮西名邑司空二山祖道場在是故人多慕嚮佛氏我巾大袖頂包手錫走名山師焉而不髡善也孑然渡江由宣之績處患而擇幽勝構故址而新是圖聳觀瞻於一鄉異

乎近世學者之為也梁天監初僧智樂之韶之曹溪聞其水香掬嘗其味云此水上流有勝地去此百七十年當有無上法寶演教六祖禪師出果如其言雖然地分遠邇而曹溪之名則一後之人念其勤儉嗣而葺之俾燈燈相續亦將如智樂所云則善之勤也庶無負

跋

跋相溪圖後

歸附初省臺缺吏用取諸有司吾鄉以三人貢子原胡

氏其一焉初吏御史臺凡三載發建寧典興化幕律身處事以平易聞閩三十月閩省理問所缺從事聞有守俾攝焉屬邑簿贓敗鞠實罷復昧其文匿其過而復其任事覺御史以失錯黜何其幸耶昔三人同貢其二或僇或屯俱以惡受禍子原平昔以善著厥聲以小失黜豈非天相善人哉然贊畫興化予雖不獲見今觀贈行詩及相溪圖其友誼交情概可見矣雖然子原遊歷東西十餘稔言辭之不遷禮貌之不易恂恂然平易人也

嗟乎今之登仕版者官無崇卑一或小失非僇則屯極而不分賢愚一致可哀也夫子原處邑末寮復攝理司從事能保厥身而歸囊橐蕭然覘其所守可見較之他人榮幸多矣暇日提披是圖如見相溪之友然則相溪之民寧不為子原思乎

跋汪杏山北遊詩集

詩豈易言哉古人於詩凡憂思愉逸悲傷愁嘆怨憤鬱悵懷感恐懼不平於中必形諸歌咏所以宣其和洩其

思成其音者也暇日仁齋汪君攜其三世叔祖杏山先生北遊集出示繇大江之東渡淮濟入黃河歷青兗達於燕冀其城郭之華侈江山之壯麗宮闕之雄奇人物之都會遍觀歷覽士君子一出偉矣哉然予味其詩皆鬱悒不平語嗟乎先生林泉丘壑之意深而風雲湖海之志澹如也授郡文學歸以將仕終僅存此集惜其無傳焉仁齋志之示諸雲仍於以見一代之文物也

跋白雲文集後

作文固難古文尤難不效古雖工無益於道文所以載
道志於斯道斯其所以為難漢之時司馬遷揚雄班固
劉向皆擅古文體製高辭氣益充然者也至唐韓柳文
體三變以去古未遠故其氣渾然迨夫宋理學而明文
不逮古多矣此又關乎氣數然也吾友仲實唐君實學
懿行自南校官歸惟世變故隱居於城南文有白雲集
關鍵理志雄偉雅健飄飄然有凌雲之風至其論議浩
渙若長江大河滔滔汨汨莫知所止蓋熟於文然也先

府君長孺先生嘗昇南軒書院時頗嘗資講習歸老以鄉校致事文章學問為時所宗仲實蓋得其家傳云所謂充然渾然者當不在漢唐下詩尤高華縉清潤有臺閣風度昔仲實嘗賓烏古遜左丞館訓其子弟左丞公好賢下士時公卿士出其門者甚多所居所見迴與人異文非難由其昧所見不得所傳斯為難也予與仲實世忝斯文好年稍長而學不及惜不得朝夕求益徒兀兀老山林下辱示文集情不能忘敬書以歸

跋百馬圖內三牛

勇於戰者必以馬力於田者必以牛今馬百而牛僅三
豈以戰居多而力田者嘗少與亦知世將用戰而然與
抑畫師當時吮毫運意殆以是與抑所謂風馬牛不相
及者與非予所知也俟夫知者予將叩兩端而問焉
跋竹洲胡君行述後

夫士之立身行道期無愧而已前廬州路儒學教授鄉
先生竹洲胡君粹德碩行建事使人曩教鄉邑相地創

學擇師訓生徒後師浮梁教充廩稍之不給構黌宇之
將墜葺敝補罅歸民田之久訟者餘百畝教有方而養
不輟先生可謂急先務矣至於施藥濟衆辟途築堤惠
於人者尤博當羣凶擾擾險難中而彼不為害也意造
物者陰相之天假之年其事業又有可觀者惜廬州之
命下而遽已焉可悲也夫先生沒垂三十年當大定丙
寅邑士坤翁汪君哀其德之泯而無聞也始述行實積
於家至正辛卯先生之孫樟得行述於坤翁之從姪疇

書篋中嗚呼先生之出處昭於前晦於後而後明於今
日益天之未喪斯文也抑其立身行道無愧而至然也
先生葬富龍山之杉木塢樟為鑿池聚流以蓄其氣衍
家所謂風水者昔杜羔失其先隴詢諸父老罔知者館
浮屠氏悲泣追慕忽覩柱烟煤中彷彿有字拂視之乃
父遺書云吾子孫欲求吾墓當於梁家問之遂訊梁果
得其處予觀子茂訪遺書而得其祖之行述豈偶然哉
館於巨室資筆耕以營其祖隴事雖與羔異而孝敬追

慕之心亦可謂厯矣予與子茂世忝姻好稔知其詳故歷叙其始末俾乞銘於當道立言之君子以貢其幽而垂無窮焉

文

績溪縣上梁文

辛亥八月
十日庚寅

伏以新安乃文公講學之地乳水亦潁濱過化之鄉道德可尊才名尤重矧絃歌之聲藹百里況政教之惠留一方顧梁棟之摧頽奈訟獄之繁劇爰因舊址復構良

材共惟令尹仲良鄭侯視篆之初謀以易蠹朽治民之
道務以施循良適當豐稔之秋又值太平之日堅剛取
夫大木經之營之簡樸合夫古規完矣美矣非壯麗無
以敵山川之勝非宏敞無以表子男之邦西挹翠眉時
覽羣峯之秀拔東瞻石鏡常懷黎庶之窮愁羨武城小
試於牛刀效單父雅彈於琴操用度廣而不煩民力工
役重而匪奪農時革故鼎新協和僚佐截長續短補答
編氓爰架脩梁輒伸善頌

梁之東搏桑旭日照瞳瞳久聞兵革三邊靜共喜車書
四海同

梁之西禾黍秋風眼界迷小邑絃歌風俗美賢臣法令
古難齊

梁之南琴堂深靜坐潭潭事簡吏閒民樂業小停僚佐
共清談

梁之北從今願展飛騰翼年登豐稔樂四方人慶昇平
歌萬國

梁之上高挹雲山數萬丈反風吹滅虎渡河又見雙鳬
遠相訪

梁之下山川一帶堪圖畫文風日振俗風淳士類彬彬
詫游夏

伏願上梁之後天地清寧人材俊傑風調雨順家家鼓
腹含飴海宴河清處處修文偃武賴一人而有慶祝萬
壽以無疆普降禎祥咸霑吉福

虎入市文

適有客過予曰近虎入市何耶夫虎狼陰類也晝則隱山林遁巖壑惟恐人之為已害暮則處幽僻惟村落是窺求飫其餒亦其性然曩歲村落間或有之市井未聞也苟一至焉莫不異而怪且驚也世俗變移虎狼白晝入市若虛焉攫犬豕牛羊復為人傷亦時耶奚其怪噫子所言者獸怪也抑知夫人怪有甚於斯者乎罔矜窮困虐斂荼毒教弛禮廢斯文其將喪乎斯其有甚於虎狼者乎客不答感而哀之遂退

南山虎文

南山之虎黃質黑章白額與彪豹伍巡深山大澤中惟
獸是食冬夏之交草木黃落得以肆志從欲猛莫斯威
藏深林伏衰草飽則眠饑乃出磨牙鼓唇掉尾而奮威
咆哮嘯風於廣莫之野噫可畏也哉然樵夫豎子或於
山蹊谷澗之際忽爾見之則胆落心喪莫知所以而虎
欲伺而食之幸而免者乃潛踪間道以歸諸父兄相與
聚謀計張機畫阱去猛獸而為人除害是心亦良矣彼

虎何知也怛然如平昔時一日諸父集鄉里之壯者強者有技藝者又羣聚而告之曰南山之虎與彪豹食獸殆盡必同人而食之里之童稚朝暮而牧樵得不為彼見見必被牙爪寧復有全軀耶於是鄉里善其說謀為機阱伏矢石於幽僻執鎗刀以尋其窟穴四合以圍之羣虎豹皆驚起莫能遁有中矢石者有墜機落阱者皆殺之迨無遺類矣且食其肉寢其皮而鄉里寧矣悲夫物以類聚物之情也今之人深謀而懷毒有甚於斯始

於害人而終為人害理之必然者由其見之不明悟之不蚤悟也因覩其事迹為文以戒夫殘暴者

代作祭鄭知縣文

公名仲良代其子永壽作

追念先考自干戈擾攘出軍旅中涉獵艱險凡二十餘年遂丞武寧閭二考有聲復移宰績邑循循治民無疾言遽色及苛虐用刑遭時事之紛紜託形氣於杳冥嗚呼哀哉去家千里孤苦零丁上有伯氏白髮鬚髻下有女兄皆髻鬣而姪姪孰知夫祿可以得名而不足以保

身孰知夫勢可以及人而天不假以脩齡嗚呼哀哉
痛裂肝腸兮老幼不寧舉目無親兮風霜慘人望下蔡
兮雲滉滉渺大江兮揚舲剖肥牲兮薦芳馨子女羅列
兮哭前庭雲車霧駕兮來魂靈嗚呼尚饗

祭表兄戴仲德歸壙文

我母汝姑汝父我舅中表弟兄如足如手幼同筆硯兄
獨挺秀比長異途兄獨守舅田園是娛日酣醇酒親友
過從禮意彌厚天不假年踰五十壽嫂氏克勤家業益

就遭時亂離歿於兄後雙厝北莊十餘年久茲當歸藏
山明水秀有子有孫貲產日茂頓等異姓兄弟親誼實
厚聊陳薄奠辭愧鄙陋魂其有知鶴駕雲岫嗚呼尚饗

祭方道夫文

代吳
祐作

某不幸早歲喪父孤苦零丁內無兄弟孑然獨處若無
所依況家貧無期功之親相為引援所幸者賴外舅念
某出自儒素以衣冠微族見稱於時於是招贅于門年
未及冠朝夕與外姑撫育訓誨樹立門戶至於成人比

長俾遂室家骨肉之親半子之分迨癸卯生繼宗在襁
抱中外舅指此兒曰汝舅臥病在牀對姊氏云倘生男
可與我為後不幸汝舅卒汝果生男遂名繼宗立為後
庶無違我兒前言無使汝舅無後也言之嗚咽動心又
云吾族應繼者無其人縱有之族遠不吾肖也田園物
業付汝夫婦掌管繼宗長大敦師教誨俾其有成立即
吾孫也汝無忘我言我老矣僅有一弟賢夫顧自有田
廬諒不為我師汝母與外姑可同居朝夕奉養惟孝吾

瞑目可無憾矣其言凜凜在耳兢兢不敢忘今年春外甥嬰疾旬餘戚戚憂念設不諱將如之何幸而無恙私竊自喜所慮者門戶之大稅糧之重科差之繁非外舅隻力莫能支嗚呼天其祐善人乎其不祐善人乎四月八日疾復邁視以為常亦未嘗服藥飲食之奉淡如也翼日吐瀉並作家人亦不經意俄頃長逝矣嗚呼哀哉追念外舅自幼以辟薦董府事歷歷倉庾筦庫中經喪亂幾隨惡少手幸而得脫嘗云世事甫定老於田園無

復他求矣憂於心者惟女與外孫繼後一事耳嗚呼天
其果從人願乎外舅辛勤起家至於豐裕平生涉獵世
故甚繁奉於身者甚薄交於人者寡儔謀於世故者未
嘗不為之用意年踰耳順鄉里稱之曰善人亦善矣嗚
呼外舅之料於前者莫鑒其脫計於後者天其從之乎
祐與外姑均抱無涯之恨者此也佳城已遷附者以為
未吉暫散乎後圃庸俟卜吉再遷窀穸茲陳薄薦少罄
微忱踴踊哀送以奠安夜壑云爾

祭先妣安人戴氏文

壽而沒於太平之世衣衾棺槨之備也必矣適遭亂離之時雖有踰七望八之壽而衣衾與棺槨之粗備而不華為人子者得不為之極哀而深痛耶吾母之生也以儉勤起家以和睦處衆不矜不耀畏威保守故家恒給而事無遺也壬辰夏四月寇至邑挈家上坑口依親弟故瑞卿未幾接踵而來罄所有而攘之吾母憂且驚寅夜去三十都泊外舅許氏以諸表弟之可托寄又慮頑

獷勢未靖安遂如十四都栖梧桐坑迤邐上竺岑之金
洲止周榮甫家山深地險將謂難可逃而禍可避彼時
吾母挈諸媳諸孫及吾兄弟凡二十餘人登崇涉險不
杖不扶徒步而趨筋力尚強健愁鬱患難忘身心之為
勞也頓雖私喜日夕兢兢於懷況四方蜂起人心惶惶
身將無所依焉如此者半載事勢稍寧回四小都莊暫
息風翼而憩萍踪明年羣寇如初避地人四散逃走吾
母一如平常時未嘗以乏肩輿而告勞嗚呼痛哉迨至

丙申二月洞猺卒至時寇據吾郡猖獗猺怯捕屯駐水
渦僅七八千餘人恣殺人擄牛羊婦女絲帛之物時俱
孥干莫之避衆驚懼以貨通於猺老幼間道出頓與弟
遠遜以牛及家之所有賂五七惡少得脫負母至葉山
時雨雪未止泥濘且畏怯步進復却顧潛高山小松樹
下衣濕天寒戰慄不已又無深林巨壑為之掩蔽覆幬
遂為寇所獲吾兄弟皆被繫吾母哀以告得免頓與弟
遠遜裸而洗身中鎗者六七幾至殞命賴天地神明祖

宗陰靈之庇免墮危難復縛至小莊以檢括未盡發而遺之苟全殘喘當此之時母哭不見子子哭不見母哀痛籲天奈何奈何誰謂吾母子復存而活耶度不可居也頃如十三都抵上塘胡家勢又未寧入大鄣山宿胡子坑幾三月未嘗知鹽與肉味風飡露宿飽常少而饑常多暮竄而朝奔憂有餘而喜不足天之相吾母者與之以壽而不與之以福及其老也與之以勞而不與之以逸傷哉痛哉丁酉秋七月瀕洞復如初壬辰多事避

楊溪坑半月雖免勞驚之患澹泊之況戰兢之懷何曾
朝夕安也談星者云吾母壽望八袞之上私竊自喜意
吾母復見太平而遂一日之樂是天不負吾兄弟也夫
何不耄而衰不疾而萎使吾兄弟失望苦痛至於此極
耶今年七月廿三日頓以事出邑母倚門而祝曰汝宜
早歸恒目送之言猶在耳二十七日訊來報母伏枕而
粥食少進不知感何疾亟歸以奉湯藥卧而未起見曰
吾兒來矣縣中事靜否對曰無事即喜憂門內之媳與

孫也憂往來車馬之擾攘也情緒不閒每每若是時則精神恍惚語言不如常時計將安施遂禱於神告於天則如談星者所云吾妹自楊村來視疾感熱證僅兩旬旅櫬而歸其痛盡為何如八月十三日也又七日吾母亦長逝矣豈期天下相數止於斯而奪吾母吾妹之速耶痛哉痛哉嗚呼棺雖具而無槨衣衾備而不華吾知其不悅於心也必矣連城甲兵頻年不息憂思勞苦萬緒千端甘旨之奉未嘗一日適口吾知其不樂於懷也

審矣哀哀父母生我劬勞鞠育之恩昊天罔極生也何
酬沒也何報九泉之下永隔音容杳杳冥冥莫聞莫覩
茲當七七設祭如儀鬼其有知耶其無知耶尚享

祭張仲敬入壙文

仲敬諱慎葬松塘
代其子英才作

維洪武二年十二月二十一日壬午孝男張梓謹以牲
粢庶羞之奠百拜祭致於先考文宣教張公之柩嗚呼
哀哉兮遭時不祥痛父之不幸兮倏焉告亡嘆家業之
陵替兮父伯先喪玆孺子立兮干戈擾攘何詩書之澤

兮遽罹此殃哀皇天之不仁兮中情孔傷奉母兮北堂
澹疏食兮韜光籌策莫措兮安貧守常浮敢淺土兮寸
心皇皇歲月荏苒兮幾星霜茲卜吉兮崇塘青山盤盤
兮龍驤生氣結兮鸞鳳迴翔水流子癸兮環抱明堂月
吉兮時良魂魄安居兮千秋永藏養生送死兮子道克
襄百靈呵護兮川流源長陰福子孫兮百世其昌肴核
雜陳兮奠椒漿

貞素齋集卷三

欽定四庫全書

貞素齋集卷四

元 舒頔 撰

傳

三害傳

蚊蠅鼠三者皆物之為人害者也較其害鼠為甚蚊蠅次之當炎暑時蚊與蠅黨結而得志駢集而陣屯尋臭逐香沾其餘澀晝之為害者蠅也伺隙巡罅紛聚如轟

雷吮人之膏血宵之為害者蚊也鼠之害過斯二者翻
盆甕噉器皿跳梁穿牖莫分美惡雖貧亦惡之予謂蚊
與蠅趨炎附勢而已鼠則靈於二者晝迺伏宵迺出物
無妍媸羣壞而莫知顧忌害尤甚者焉嗟夫世之害者
豈斯二而已哉微而害物私而害公大害天下國家豈
非斯類耶而予因有感作三害傳

二節婦傳

華陽在新安郡北當孔道山多聳拔連匝民生其間率

多峭直至於婦人亦皆守貞不二志其一朱氏適宣政卿汪仲英年二十喪所天事舅姑以孝稱鄉里間生子一同文撫育至於成人延師訓誨綽有父風葺舊田廬給以衣食躬歷辛苦克成厥家至正間嘗以節孝聞於朝同文破產竭孝道因世革不果就迨洪武來復舉於御史亦不報年七十有餘矣其一胡氏適汪龍年二十四子芝孫年二歲而龍喪家微其先隸於邑辛勤鞠子比長置身伺縣中年三十以疾卒僅有一媳同甘苦育

諸孫壬辰兵戈後室廬既燬家無餘資亦守志不二今年七旬有三淒淒然耗耗然常著短布襦治家為活云貞素子曰自兵戈離亂後婦人守節者蓋不多見曩余客金陵時姑蘇破軍卒虜一女子云其父嘗為吳郡吏貌甚都善作軟語媚其卒同過維揚會親戚乃與合卺舟渡江半輒自沉終不為所污此女子之守節者然華陽居萬山中二婦生長其間非有聰慧之資識見之異其卓卓自守不為溷亂移易可尚也夫魏曹文叔妻令

女夏侯文寧之女文叔早死無子恐家必嫁已乃斷髮
為信後家果欲嫁之以刀截兩耳曹氏誅文寧為梁相
微使人風之又以刀斷鼻令女曰仁者不以盛衰改節
義者不以存亡易心予觀之令女無子不嫁毅然氣節
千古之下直欲與日月同光今二婦有子不嫁理固然
也而較之優劣雖殊然皆有烈丈夫志嗚呼世有食祿
享榮臨難遽易所守甚至賣降恐後反婦人女子之不
若何哉世道不古民風日媮觀於此寧無愧色況事關

綱常風化有非汎汎細故者比予故牽聯書之以警夫
世之背媯並失所守者少自省云

賦

瑞蓮賦

理侯天章治唐昌之明年移植白蓮於治旁又明年
花乃變為紅而雙頭並開邑之民咸以為瑞形於歌
詩未幾除新安別駕乃瑞之徵也為之賦

繁草木之殊花兮氣鍾陰陽孕奇毓秀而生兮異夫尋

常託根何所兮來泰華之高岡處淤泥而不染兮心涵
雪霜湛七竅之玲瓏兮纖絲中藏忽駢首而並蒂兮花
於唐昌伉同莖而交頸兮恍若水上之鴛鴦始縞素兮
幻紅粧訝美人兮雙低昂窈窕綽約兮馮夷中央儼亭
亭兮類直方慨鮮葩之殊特兮為人降祥自李侯而致
之兮孰云匪臧爰宰百里兮乃推恩光澤及品彙兮惟
德是將意造化之陰符兮瑞應循良昔異畝而同穎兮
惟周之彊矧薶麥兆瑞兮曰絳之鄉嘉禾連理兮載諸

典章和氣致祥兮羣生蒼蒼侯之聲聞兮遠邇洋洋宜
超昇兮位列黃堂竭來新安兮先聲播揚先此邦兮何
酷何戕倒施顛錯兮苛虐為殃侯之來兮埽犴糠六邑
熙熙兮父母是望小大煦兮歌擬龔黃志激清兮突過
范滂秉鈞廟廊兮作柱石黼黻皇猷兮為君棟梁致吾
君兮超軼乎陶唐

蕈賦

並引

蕈非一種有松花蕈蛤蕈肉蕈香蕈竹姑之屬松林

茅地間二八月有之樵夫豎子知其名采鬻於市不知名者食則殺人因作賦曰

彼松林之翳翳兮土恒潤而處卑當秋季與春仲兮紛異色乎離離霑雨露之殊恩兮迺成形而產茲謂童子之奔競兮攜籃籠而去之何黑色之燦爛兮茁無根與土皮名可異而可食兮宜供羹而帶靡膾微辣而細縷兮肉稍腴而薄披友玉版與紫蕨兮味甘美而益奇積磊磊於盤飭兮恍有類乎玉芝名不識而遽食兮遂殞

命於一時憶蓴絲而去官兮惜李膺之未知慨商山之
莫逢兮嘆首陽之甘饑啖苦笋與彫胡兮何孺子之可
悲獻我君於九重兮咄曝背之龐眉意溪毛礪渣之可
漱兮吾焉舍此去含飴辭曰拳拳萬物陰陽乃和惟木
有耳惟葉有義氣同質異輩其孔多靡根靡蒂匪華匪
柯薦之宗廟頌聲有那商周或遺是用作歌

說

貓不捕鼠說

予家罹壬辰寇劫後居無恒居城北曹氏寓廨僅存予
往來假寓焉草眠缶食苟爾延息迨至乙未時事猶未
靖朝夕惕惕暮則羣鼠跳躍叫嘯甚至不假寐鄰媼畜
狸奴甚馴假而歸之時而食焉將俾捕而寧寢乃狸奴
者饒於食而不饒於鼠鼠得以自恣嚙而無忌作勞而
無畏憚狸奴若懵然乃呼狸奴而告諸汝食我食同我
居寓羣鼠跳躍叫嘯而無畏憚亦莫汝捕殆如無某氏
食汝何耶吾將再於他氏假狸奴俛首欲答而不能乃

因嘆曰吾懼夫鼠竊為狸奴是託茲不捕而恣鼠虐豈
惟負所託亦竊耳彼利其利而不利於物與汝竊吾食
而莫吾捕奚其異乃即攜狸奴歸於鄰媼鄰媼笑而受
之予亦發一笑

瑞瓜說

莊畔小圃地靡盈十丈命童稚治畦雜蔬及瓜夏六月
長繚枯篠衰五六尺許蔓駢如掌生首若雞冠壇蜒若
青蚪一蒂十花並開而實者七亭亭拳拳可愛可愕人

奇之以為瑞予亦異之嗟乎禾之異畝同穎周以嘉稱
麥之一莖數穗絳以瑞應迨夫田中之麻九野之禾凡
一花一草為時瑞者種種載方冊茲瓜之異於常詎非
瑞乎雖然時乃不祥瓜之瑞為時而出則其謂之瑞也
宜哉

祛邪說

鬼神之事聖賢之所不論非不論也理不可經詰也不
語怪亂神是也由是觀之杳冥茫昧千變萬化聖人且

不可詰而況常人乎張子曰鬼神二氣之良能程子曰造化之迹斯說最妙但未易窺測耳能窺鬼神者其惟知人乎姻高仲汪氏家世儒者受父師之訓讀書達時務於性命禍福之說亦嘗討論而推究之吁鬼神之情狀抑知之乎抑究其所以然乎抑其中亦有所感而篤信之乎說者謂施符水祛邪魔捷如影響斯道家者流予孔子徒也於鬼神之事未嘗究心夫學所以明理杳冥茫昧豈敢信言之暇日仲江攜是卷過予予嘉其聰

敏而多能也懼其惑而誣也復憂其泥於誕而致沈也
作是說以貽之

退思軒說

夫人之立大功建大業必本於思思則明明則不惑凡
發心施於作為者皆思也傳曰二五事思曰睿睿者何
通其微也又曰慎思此誠之之目也學而知也曰近思
則心不外馳而所存自熟仁之道具焉曰思無邪統三
百篇之義而言均思也特所指異耳原夫心之所發萬

慮萬變其要歸於正而已思云乎哉昇施君孟文昔從事都督耿公幕訓練士卒發謀出慮時號奇兵性度溫粹質美而德懋望之皎如玉樹然識與不識咸稱為寬厚長者又喜為詩文日觴七友相與倡和鏗然有聲僑寓紫陽山署其軒曰退思德之養也子曰君退而思將一日三省如曾子乎將謀猷畫計如孔明乎將鎮國家撫百姓如蕭何乎不然退而奚思經曰退思補過無乃思其所不及與抑優遊而思進與君曰不然子言過矣

大丈夫生斯世進則思竭誠以報國退則思脩身以行其道古者堯舜之治天下思以仁民無怨桀紂之治天下思以暴民多議就其如堯舜者去其不如堯舜者如斯而已子所謂大功大業奚出於是哉予退而思君之言悉矣敢述其意書而揭諸軒楣

墓誌銘

故處士張君吉甫墓誌銘

代旌德縣
劉性撰

至元丙子夏五月績溪有布衣張吉甫以疾卒於是鄰

邑與其邑之往來者交齋咨痛相弔曰急誼豪俊之君子死矣不可復見矣余未始識吉甫也而其氏名徃徃熟吾耳則必非庸衆者比是年冬吉甫之孤憲廣以其里儒胡相所述事狀來謁銘曰吉甫諱有常幼名重五姓張氏曾大父賓號拙翁宋授江東提刑官大父恢魁漕貢進士父騰光宋太學生吉甫年十二志趣超卓氣貌沉沉提刑君見而奇之曰是宜為吾曾孫必大吾門故吉甫自少讀經史洞悟玄貫本末粲然反已篤踐不

再見聞然亦未嘗以自多也既壯去遊四方益究覈人情物理善趨時識變而終不與人苟同故無所遇合而歸居鄉里崇睦婣之行赴人之急以唯諾聞善策事之是非成敗云後當然已而果於卹孤養老尤極隱惻周盡每鄉校闕官必攝事葺舊起廢達禮平氣士興其義題其居曰恒齋門無雜賓惟邑大夫之問政暨秀民之講學者造焉初娶胡氏無子後娶章氏子四人憲廣懋慎女四人孫男七人享年七十有三墓在邑之西九都

曰葉里憲廣之來謁也禮甚莊容甚戚辭甚恭予既辭謝不獲則謂之曰予未始識而父也而今子之志不可以未之遂也矧曩者余相識也向老人言庶幾可徵余觀古昔盛時取賢斂材於其不能文辭者往往張其事以激靡敝之習求之於古亡有是也而父既没子能頗頗致孝容稱其服知名其先人之行茲非道之行於家乎鄉校者公論之所出不可壓以勢力而父攝事而長老子弟咸推服無異言茲非德之孚於鄉乎且號其讀

書之所曰恒則吉甫之學有見於此恒也者德之平常而可久者也世或稱吉甫為急誼豪雋此其本矣銘以是庶其傳哉憲廣皆再拜稽顙曰子誠為知吾親者銘曰

古風悄悄以有恒心世媿孔壬浚之求深展也張君以恒不憚於家於鄉式昭德音績溪之陰墓門有林勿剪勿侵嗣人之欽

銘

謙益齋銘

歛鮑尚文氏積學好古扁其齋曰謙益乃為銘曰
六十四卦惟謙為吉內止外順虛中以立高而能下卑
而能屈處卑而自尊取退而自佚屈已待物恭已作則
有歛鮑氏沉潛六籍且讀且脩齋曰謙益精進不已聖
賢可及我銘斯齋勗爾令德

循善堂銘

循善堂者邑南余宗益之堂也予嘗記之矣復為之

銘以致相期之意銘曰

肇初厥祖家蕃銀峯

德興也

學貫經史臚傳公宮子作孫

述繼承可及熒然令聞式昭厥德迨十一世綿邈亨貞
有學有述乃遷祖塋楊溪秘閣山水衍廊遭世亂離辛
勤厝擲徽饒異邦同此東江吁丕休哉碩大且厯植以
厚德雲仍蟄蟄三槐可徵五桂可必以啟其後以光其
先小子作頌以永其傳

惟善堂銘

郡守魏侯璋築室退處於城東偏其燕寢曰惟善乃
為銘曰

楚國無寶惟善為寶著之於經允矣為好昭烈將終遺
言戒之毋以善小而弗爾為苟能善善克已無倦人欲
既消天理乃見厥初降衷至理渾然所性一鑿狂悖生
焉善乃天性靡生厚薄孟氏道善苟卿道惡善惡之際
處貴適中苟也小疵軻言至公嗟嗟後學罔知所履柔
則不立剛則無禮頎頎魏侯以善名齋朝夕仰瞻動作

與偕善行是果善處在我守此恂恂戒彼不可難鳴而
起乃聖之徒中心勿遷為後之模小子作銘僭竊是告
敢告雲仍善繼芳躅

松崖銘

董建中氏通儒術論星數學以松崖自號徵予銘銘
曰

形臞而清質堅而貞傲霜雪操結歲寒盟嶢石坤厚不
騫不崩屹立萬仞載瞻載登伊誰之好託以高蹈番易

董生松崖自號談子平術觀初菴星參皇極奧玩巫咸
經氣凌雲霄根蟠大地一朝良工材用可致彼炎我峴
彼紛我恬進退用舍時乎我占嗟嗟小子安其所適敬
慎厥德永保貞吉

贊

呂婦贊

巖鎮呂竹坡左史之孫女諱嘉貞年十七適吳氏子
壬辰避寇黃山桃花潭為寇所殺徵予文為之贊曰

閨門四德柔順居先臨難不屈出乎性天羣盜旁午巖
遯穴宿逢彼惡少至死不辱年未及笄聘於吳氏志節
凜凜風化是矢左史裔孫亞竇氏女納款受降寧不愧
汝桃花潭上聞者嘆嗟我贊高風貞烈永嘉

箴

復齋箴

為林彦
和作

客有號復齋者學陰陽家余未面晤友王生彥高徵

予文箴曰

陰陽至理悉寓乎易筮決吉凶兆始於一龍馬負圖象
數互立六四乃陳迭運駸駸陰極於子一陽來臨於卦
為復見天地心務學深智有林氏子研義文興蹟旋璣
理以復命齋聖域可企汲汲孜孜無利於時造化之妙
茲焉是推朝夕黽勉敬慎爾思

雜著

普慧居士偈

有學佛氏者普慧張其姓短褐而絺巾望之知其為善

知識也慕空尚寂於究竟殆未超脫欲俾人人解悟性
根通徹本源見如來法身徧河沙世界是心普矣俾慧
亦普恐未也夫人為萬物之靈稟賦有清濁之異清者
慧而濁者否焉烏乎而普是故普慧者佛氏之心也予
懼夫迷於近而遺乎本乃作偈以解之

厥初形始賦慧性已云具朗然萬光明照耀靡內外混
混物欲中昧目唯見佛至人性不移不為彼所汨心有
普慧心了了長如是每於靜處觀皎若大明鏡脫彼汚

濁途超入清淨境竟作如是觀皈依悉解悟

沈谷華休官入道葢菴疏

處士沈谷華久厭塵勞將依清淨天官告老道妙求真
茆屋中三教俱全蒲團內一心無染出家兒豈有卓錫
之地平道人兼無點鐵之金短疏恭持高賢樂助

伏以五柳先生為折腰而棄職三閭公子因新沐而彈
冠民生之至樂曰閒鄉論之咸尊曰老笑指白雲歸去
還他外物高人醉邀明月同行輸與詩中樂聖一壺酒

一枝花儘教慢舞狂歌數株松數椽屋贏得早眠晏起
生於土歸於土百年空自經營貧在天富在天一世何
妨落魄衛國蘧夫子知四十九年之非西天善財童解
百千三昧之智學有蚤莫道無聖凡悟則四病四相皆
空迷則八識八風俱起蓋棺事始定古今那一箇抽頭
臨死淚方流瞬目使衆人彈指既知如此即合處分且
如老去做道人大似急來抱佛脚有證有脩絕類盲人
模像求解求脫還同巴客驚蛇福田罪性本來空地獄

天堂皆是幻包天包地無過一點真心通鬼通神只是
一箇誠字照鏡迷頭演若達多狂走割皮憫世刪陀羅
樹能醫白老鼠黑老鼠嚙斷藤根好冤家惡冤家合成
煩惱昔歲漂沉丘井今朝跳出樊籠解放癡條潑殺悶
火便是人間快活漢真成蓬島地行仙黃金鑄鼎要烹
天地之根黑水煎鉛將鍊兔烏之髓半斤八兩多是一
內生成萬彙千名盡向三中變化秦樓楚館天涯芳草
王孫蘿屋松牕紙帳梅花獨自雲筒息氣一聲高一聲

低聲聲透徹虛中拄杖麻鞋幾步險幾步穩步步踏着
實地老先生醒了也衆徒弟去來今回首見麼能幾日
桃李春風屈指數咱自連夜梧桐秋雨且道目今何處
安身立命便休推調這裏弛擔息肩抖擻舊精神安排
新格範貧道人於紅塵中開市裏不寬不窄非正非偏
平地上安閒處蓋一座小小茅菴富長者於歡喜內慈
悲中或重或輕隨緣隨施福田邊塵俗外做一件大大
好事謹疏

登源祖廟疏

伏以英雄定亂拔劍輔翼於李唐威武靈顯錫號寵光
於趙宋赫王封之八字魏廟食於六州惟我乳水登源
實齊司馬陵寢為藏祖之故地建奉主之專祠既殿庭
久燬於劫兵賴明良再謀乎棟宇雲車鐵馬神光烜赫
於前朝虎畧龍韜功績播揚於今典民有水旱疾疫禱
之默然國無凶荒札瘥護之惟謹茲聖主欲重新建造
而賢令擬復舊完成正殿聳雲霄大京小桷之攸用粧

樓鎖烟霧深閨邃閣之適宜前後亭臺要使行人唱采
西東廊廡須教觀者點頭小道人不免抄題大夫士慨
然樂助况朝廷下捐免之詔貧富饒優而廟宇及成就
之年公私吉慶五風十雨兆嘉穀之攘攘百子千孫祝
民家之世世福緣有自功德無邊謹疏

贊
附

題許公仲三小像

長身玉立奮威武於亂離迨乎成平恢廣大之鎡基天

欽定四庫全書

貞素齋集卷五

元 舒頔 撰

古體詩

為苗民所苦歌

六十韻

二月初七日壓天風雨急僕夫問訊回苗民水渦集倉
卒戒行李二三競奔入天寒泥塗滑出戶出不得或牽
牛數頭或縛鷄數隻長鎗插簷高短劔耀白日動輒便

殺人相遇焉敢敵雜以無藉徒孰與分南北老母驚且
憂扶持間道出彼來以此道囊橐罄收拾急度墓頭顱
復恐見雪跡行行葉山凹手足俱戰慄兒云母疾行母
說疲無力坐憩長松下蔽身草不密又逢惡少來見罵
作強賊刀鎗羅我前性命在咫尺母云我兩兒懼怕避
橫逆再拜致哀告慟哭並二姪衣衫盡剝脫裸身肉見
赤長繩與弟連縛手黑如墨嗔叱行步遲遽以大刀擊
血流未得止苦痛便走疾漸圍至田中鎗立哨齊吸拔

刀斫弟項乞免幸弗及母憂失兩兒兒復憂母泣艱險
萬狀生憂危勞苦役內懷五臟饑外被一身濕箠楚卒
未休死生安可必山中亦何有所蓄僅米粒檢括殆無
遺忽忽日將夕留連至宋村心緒茫若失倏逢逢一卒
相見似相識懇懇甚心慈衆皆被呵叱但云解其縛外
懼心悅懌兄弟相依回泣母何處覓哀矜復自憐舉目
百無一頃刺子見母哀號叙痛盡斫松代膏明拾草當
菅席主僕皆畏寒相忘共薰炙憂懼不待明雞鳴咸盟

櫛又復去喜坑晨星尚未沒山家避舍去老母獨匍匐
逐隊躋山椒冒雨倚松立頭上水淋面足下寒徹骨明
日古唐山盤折猶律率亂石如蹲虎狹徑跨其脊呼號
風泠泠掩映雲羃羃初疑茫昧中天地始開闢往來不
暫停昏黑亦忘食當時已狼狽寧復問家室幼女猶可
憐含啼抱嗔不憂行路難但恐棄溝洫朝廷本除禍
仁道立民極假威及蠻獠所至皆戲劇殺掠果何辜曷
嘗分玉石披蘿遍山林蕩掃空郡邑不幸生斯時處處

值荆棘皇天遠不聞愁悶填胸臆殘喘倘久延今亦匪
疇昔渠魁未殄除默坐長太息

欲雨不雨歌

四方突兀雲峯起一聲霹靂震天地畎畝欣欣望不來
須臾耆老翻憔悴風聲蕭颯雁橫塞掃却雲霓無點翳
天生萬物出至公底事生民不蒙惠西方有雨東方晴
無乃天帝私意萌天下有道人議雨暘不均安不評
莫不是東海殺孝婦又恐是閹閹多寃眚彼有罪兮彼

當罰此無辜者施恩榮墨雲閣雨不肯下為問歲功何
由成君不見田疇坼裂焦黍稷忍渴卧溪許於
是鞭雷公叱電母謫情龍叫天母神祠血食貪臚腥真
宰萬靈亦何補嗚呼我為蒼生賦稅憂食祿大官焉知
民間曠乾苦

戲楊桓子威歌

僻居陋巷無車馬綠樹清陰對瀟灑皂卒敲門耀武來
將軍元是風流者名家陝右赫前朝小試弓刀亦閒雅

自言離亂步艱難磊落情懷輒輕寫飄飄仙珮遠自汴
洛來鶯鶯燕燕何事雙飛回情深宜料翻成怨恩重自
古多狐猜江山迢遞夢魂裏風雨淒涼思慮起悲歡離
合各有時共明月今隔千里君思妾兮含怨疑妾憶君
兮傷遠離願將顏色託鸞鏡長照此心無少虧

月灣釣者歌

月灣釣者天與閒

吳月灣山
長樂平人

長日釣魚明月灣黃昏坐

到月上山天低月高人未還月圓在天半在水明月灣

頭人所喜先生月灣家密邇坐釣明月那可已波神起
笑弄明月月滿波心魚撥刺黃昏搖尾寒餌沒爛月錦
鱗魚上出得魚叩月喚隣家煮魚和月吞香霞舉杯月
來金滿花酒光蕩月天無涯杯痕倒瀉月入腹月興惱
人清不足杯天仰空月照目顧影翻憐月孤獨夜深月
冷霜雨天勸月不飲月乃賢置杯愧月坐月前月謂汝
飲天之泉呼童就月即更酌月故憐人月不落月在憂
來無處著但恐樽空月相却我不知曹老瞞明月可掇

憂無端豈不聞嚴家漢灘月不滿羊裘寒非熊辭月就
西伯夜夜渭川空月白未如明月灣頭客酌月取魚賒
酒吃忽自笑把酒問月者何如古人今人月在諸金尊
照月常不虛胡為捉月騎鯨魚青溪好月連江湖迴環
九曲月若鋪我今亦願為月灣釣者磯頭徒展席為月
沽酒後耳熱醉舞明月歌鳴鳴

洞簫歌

為朱士
元作

我昔遨遊敬亭山飛仙月底鳴珮環二十四管列鳳翼

宮商迭奏縹緲之雲間紫姑吸玉液爛醉眠天闕不知
星移斗柄轉但見池上桃熟垂紅殷又聞悠揚清韻起
復止嗚咽彷彿啼小蠻當時蕭郎鳳樓教弄玉騎鸞海
上一去不復還後來新製祿山獻梨園子弟意在娛妖
環雙溪疊嶂別我久物華亦換我亦兩鬢斑謁來金陵
董大築忽聞朱郎學弄玉蕭史去已遠誰能授新曲雅
音久隳廢舉世淫哇續秋風泠泠欺茅屋歸去來兮早
田熟何時攜此四尺竹為我倒吹一洗世間之塵俗

落梅歌

一枝兩枝橫水濱
千片萬片飛早春
殘香滿地鋪白茵
貪結青子枝頭新
含章簷下肌理勻
春夢未醒香醪醇
君王寵愛恩情申
何況點綴額與唇
託根巖谷遭時屯
莓苔剝落湮紅塵
碧玉柯榦供樵薪
更復擾擾來棘榛
疇昔開伴粉署賓
東風輕點泓池銀
歸來天上迹已陳
心腸鐵石見無因
惜華長歎華下巡
見仁頓覺添酸辛
角聲吹月雙眉顰
不知誰是調羹人

大木為雪所偃歌

前山夜寒雪三尺大木盡偃僵且直疑是帝謫蒼龍精
潛形岩壑事脩飾天公責物何無情至重屈折出至輕
卧如鋪瓊瑤豎若立甲兵只愁漏朝旭照耀形與精嗟
哉復嗟哉徒爾懷大材良工不見遇斤斧行相催君不
見今古忠臣與烈士負志屈節皆如此

百牛圖歌

緊誰畫此百牛圖絹素淋漓懸兩壁摩挲細認角頭奇

無奈戴嵩留官墨牧童騎策過前村春樹陰陰春草碧
雲收霧斂山花明遠近顛崖翠光濕平湖斷岸水淺深
皺穀粼粼展如席犢眠草間牛不乳饑啣青芻礪蒼石
或飲或浴雲滿身物我相忘祇自得橫斜體態百頭殊
牧豎籠雛戲阡陌有時背上顛倒騎細雨斜陽橫吹笛
時平放爾桃林中布谷催耕苦相迫嗚呼比年兵革彌
天下千畦萬隴生荆棘只今農父把鋤犁處處開耕皆
爾力斗米三錢戶不扃四海蒼生無菜色

秋風行

涼風起空濶即漸吹寒聲路遠衣裳單良人久從征妾
身勤機杼唯恐衣未成短裁便鞍馬密縫憂遠行君昔
辭家去王事迫期程守邊十餘載殺氣猶崢嶸夫亦身
徇國妾亦死誓盟志同心不改庶保身後名

趙趙行

二月晦日擬出邑中雨阻不果因賦之

今朝欲出還不出何況四山風雨急帶水拖泥我所嫌

息肩弛擔心方佚既無汗馬功又乏耕鑿力暮史朝經
聊自怡春塲秋選從遷秩天命付已定所得今已多任
人笑我成蹉跎洗眼看破走奔波萬千事計意謂何百
年一夢歸南柯漢祖麥粥滹沱河不如商嶺四皓歌烏
江項羽揮長戈不如採薇陽山阿君不見王霸功業殊
總是一杯土英雄爭戰到頭誰自悟君今洗耳聽我歌
趣取青春樂尊俎

次張德政觀瀾行

墨雲壓天殷其雷白雲如注西南來於時我方高枕卧
池上菡萏花初開從渠雷昏與霧暗推起蓬牕時一看
頃刻陰靈盡掃除但見衝堤仍破岸黃流渾渾能幾時
陰陽氣忒何須悲風平浪靜有妙處綠漪招我枯籐支
我本人間無用叟瀾兮瀾兮觀汝久蛾眉亭下如斯夫焦光
寺前亦非偶縠紋細細萬頃寬鱗甲簇簇生瀾漫容光
照灼上下千萬態馮夷仙子往來乎其間天風不來如
鏡平一輪明月海底生兩眼長向江湖看詩成落筆魚

龍驚山溪一篙足梅雨波濤不浸中流柱靜觀莫怪當
時人南北滔滔皆要津

繅絲行

小麥褪綠大麥黃吳姬踏車繅繭香尖銳入沸高下忙
雪電萬斛浮瀟湘千絲萬縷雪炯光五色期補帝舜裳
縣吏夜打戶租稅無可措猶豫欲輸官又恐奉上誤躊
躇展轉無奈何東方漸明事更多

蒼鷹行

蒼鷹擊煩背爪困無力城狐社鼠白晝縱橫出天高日
遠維不張湖海茫茫漏餘迹君不見楚歌四面驚老奴
不聞天子聞亞夫

織婦吟五首次知縣許由衷

妾家住西河家貧守清素年方二八初學織常恐暮父
母生我時不識當門戶夫君良家子安肯受辛苦

二

機織不畏多但畏官府促去年布未輸今歲糧未足阿

姑八旬餘縮首日下曝君戍憂邊庭妾心念機軸

三

妾憂機杼空惆悵時停梭機空且勿憂戍遠當如何烏
鵲噪簷樹紅葉翻庭柯夫君萬里外妾織愁愈多

四

亂絲入手中上機十數足細花間鸞鳳精巧俗莫測朝
餐釜底焦夜靜壺下滴君心自明月願照勤苦力

五

天邊比翼鳥庭下連理枝
高枝接伉偶孤鳥鳴何悲
妾織還自製遠寄良人衣
君心諒匪石歲久當自知

絡緯吟

夕雲淒以清涼颼然至
籬根繼續聲長繭綠絡緯雙
股依草茲兩翼鼓元氣月明更漏遲
似訴無限意微物尚知時難彼非物類
我懷素瀟洒聞汝澹心慮

題子猷訪戴圖

雪霏霏雲暮暮一色乾坤無四壁
乘興移舟半醉醒故

交剡曲真莫逆古人情今人心色取行違何侵尋管鮑
去後俗風降披圖感歎懷山陰

百馬圖

一馬百馬等馬爾百馬一馬勢態異龍眠老李意脫神
代北大宛無不至樓蘭失國龜茲墟玉門無闕但空址
葡萄逐月入中華首著如雲覆平地始皇長城一萬里
漠雨平添窟中水將軍昔有李二師尺箠長驅萬騏驎
當時無乃或爾遺翫飲翻沙縱眼戲就中驍黠與踈

或示仁柔奔且逝循坎屹立意度閒下首當膺若多智
昂頭振鬣彼者雄似恐世閒無猛士輪臺詔下不再求
蕃使往來知禮義不徒嫁女事烏孫祇以金繒相贈遺
茫然圉牧不知誰牝牡驪黃父乳字世有伯樂不願逢
御若王良空善技汗血溝珠胡爾為無能安並驚駘視
唐家太平有天子開元天寶周四紀是時天下政無事
深宮每欲妃子喜教之舞數政如此漁陽鼙鼓動地起
祿山見慣亦有似可憐零落四十足後來值得田承嗣

竹溪書室圖

為黃克
文題

清溪溪上竹無數愛竹移家竹林佳階前老竹鏗玉聲
秋夜讀書霑竹露書聲繞屋雜竹聲竹色侵書助書趣
竹根箇箇長龍孫竹上鳳凰亦來聚有時攜琴陪竹彈
兩袖清陰分竹翠雲梢月榦竹弄影杖竹尋詩過橋去
平生性癖亦愛竹不問主人造竹所君不見一筇投陂
忽變化萬卷蟠胸勝插架

六人蹴踘圖

趙太祖 太宗 楚昭輔
党進 趙普 石守信

青巾白袍虎龍姿紫袍也是天日奇風雲之會此一時
太平無事不敢知君臣更作軍中嬉紫薇小星燕尾眉
雪爐熾肉寒語遲大嫂婦人殊不癡一榻之外他有之
江南來臣河北遺開封大弟汝自為此意誰與同襟期
蹴踘對戲兩不疑攬衣政發羣雄嘯党家麗人蓬鬢垂
羊羔金帳趁婢兒頭巾半脫背後窺彼楚與石聊相隨當
時總恨弱子欺亦愛三百開洪基禮樂文物如諸姬吳
興錢選操兔錐落紙或有無窮悲周人彷徨歌黍離

唐十八學士登瀛洲圖

王宏正
白描

天策將軍龍鳳姿十八人者皆英奇乾坤施轉豈無意
風雲會合固有時唐虞盛際九官爾而此乃復一倍之
神物在淵衆鱗集五采下德百羽隨後來可惜貴才俊
祇遣上古歌雍熙河汾夫子講孔道弟子僅以功名期
當時房杜亦可喜管仲器小寧無譏儒冠一着道士服
豈為老氏談無為穎達祖漢疏經義宜於聖興初未知
歐虞褚薛尚筆翰一戈何足窮毫釐魏徵王珪差解事

亦足以格君心非玄武門前起倉卒手足之血親淋漓
此時此獠可撲殺致昏仆碑竟何其斗米三錢戶不閉
小康不補大義虧瀛洲一登老生願丈夫須作真男兒
護龍河頭生紫氣鬱鬱葱葱天宇彌金陵豈無此學士
醫官酒保登天墀奎章閣亦太甚天厯詔書無乃危
布衣無能坐長夜獨搔短髮頻歔歔老妻笑人小女起
走把青鏡臨鬚眉西家好酒賒來喫無用勞煩閭畫師

西湖曲

儂家生長西湖住畫舫紅牕日來去不識干戈戰四夷
良辰歌舞酣朝暮越王懷憤攻城來士卒失守城門開
嬌容如花惜不得一旦零落同蒿萊百年氣運如過電
頭白眼昏那忍見商山路杳雲霧深桃源不假漁郎便
錢王宮闕草樹荒景靈臺榭風雨涼孤山梅花幸無恙
父老含悲辭故鄉

江南曲

庭院深沉日正長綠牕紅几繡鴛鴦落花風起停針看

蝴蝶雙雙過粉牆

悶倚西牕月上時
月將花影弄花枝
欲將心事託明月
花有殘時月有虧

寶鴨曲

銅池織風翠波躍
睡足暖烟饑不啞
重簾未厭雲水姿
華屋清深寄閒絕
生硃剥花紅錦翅
枯咽半濕舊徽水
寶燈夜懸琉璃光
恍若淡在滄浪裏
當筵慢舞得嬌嬈
指痕膩染羅紋細
就中空有絕纓人
誤織韓韓壽郎衣

上氣古聞爲花之言豈虛語願學飛仙作雙去

湘中曲

并引

湘中徐姓官淳原偶以事逼沉於井其妻妾仍寓官
所隣邑令故人也為同鄉昔同仕徐交甚稔知其新
寡遣人邀之遂至往來數數懽甚浹置酒食出肺肝
語求其妾其妻諾之將卜日締好忽松蘿人求媒不
允隱前議託詞歸湘中故人鬱鬱不樂明日告行攜
酒饌送南門外泣下各不忍別去若留情者至中途

通松蘿人以妾從黥令故人聞之悵悵若失不兩月
事覺坐金陵獄噫大丈夫居官若此者豈斯人耶墮
婦人計者徃徃有之大抵好財與色者皆是彼以貪
敗此以色謀相去遠哉俱謂之不仁可也矧區區一
婦人藏機設計若此匪妖則禍為丈夫者才識可見
矣黥令月餘徒索死江寧鎮婦乃伶者閔其事作湘
中曲非欲傳於世也抑亦厲風俗並為居官者戒
妾家湘中曲十五事所天二十從夫君出戍守塞邊食

祿徐陳間奔走不記年轉官入宣邑朝夕尤拳拳不幸
夫君亡中道成棄捐故人宰隣邑仰望應周旋念昔交
邦深將謂心如前挈家來相依此意未易宣入室拜丹
旒遺思及九泉遂託通家好往來無姻聯私情中忽動
外議殊未然託辭歸故鄉擬買番江船番江路綿邈情
亦中道牽黔山亦在望乳水徒涓涓昨朝與君別芳草
蔚萋芊妾意君不知因知非因緣鸞飛求其凰鴛鴦不
獨宿妾身如楊花君心如明燭燭明不照羅襦聞花飛

東風恣飄逐古來儂薄無男女何況時情易翻覆嗟哉
時情易翻覆可憐彼此為身辱嗚呼世無柳下惠罕見
盧氏妻近代賢郎亦如此不獨斯事令人悲

秋雨歎

我行郊原積雨霽禾黍高下秋離離老翁拾薪焙晚濕
羸婦拉穗充晨饑村鄉啼號若來苦老幼奔走城墻疲
自從四月天雨雹至今老樹枝離披羣鳥雜處隘道路
庶姓辟壤栖茅茨下土銜怨天降禍天為除禍民為悲

遂令四海若鼎沸荼毒綿互無盡期安得旄頭鬼與死
坐看雲起來遲遲

繅絲歎

東家繅絲如蠟黃西家繅絲白如霜黃白絲出蠶口長
短繅出婦手大姑停車愁解官小姑剥繭愁冬寒向來
苦留二月賣去年宿債今未還手足疲瘵事亦小官府
鞭笞何日了吏胥夜打門稚耄生煩惱君不見江南人
家種麻勝種田臘月忍凍衣無邊却過廬州換木絲

漁父歎

溪淺每愁魚鼈少澤深又慮蛟龍居移舟猶豫生涯拙
舉網徘徊作計疎山水清幽亡足迹江湖寬濶足庖厨
古來疎畧今猶密輸與陶朱得自如

續無家別

一生辛苦杜陵老白髮被垂常不飽夔州同安經亂離
才畧謀猷蘊懷抱我生不辰時偶同挈妻扶母西復東
風餐露宿萬艱險一已之外物物空富者相積今何有

不如貧賤餘升斗我今漂泊居無家妻子相看俱掣肘
事業赫赫歸英雄遺臭風烈將無同掀髯一笑入山去
萬壑蒼翠啼天風

續新婚別

妾生二九顏如花父母許嫁歸君家錦衾香融情脉脉
君成別妾天之涯君去日益遠妾身何所依持贈古明
鏡背負雙鸞飛鸞飛雙鸞雙意和協君心如鏡光皎潔願
分光潔照妾懷莫遣孤鸞泣離別泣離別嗟新婚人生

誓莫生閨門祇恐容顏易零落妾心願早承君恩

湘妃怨

湘江清湘月明月明不照湘妃心水清翻污湘妃裙九
疑雲深蒼梧死萬古千秋只如此含雙淚竹上彈至今
湘竹留斑斑空令後世人長歎

春日謠

春雨昨日長綠苔春風昨夜吹殘梅花殘尚覺春未老
頭白怪殺春相催天上春光法天道人間春色貽人哀

天時代謝人事變變極依舊春風來

祀事

五章章六句

祀事國家崇敬也離亂後不覩茲典久矣迺今山川
社稷風雷肇置壇壝齋庭庖湍列以位次春秋祭拜
非昇平之幸與華陽山人舒頔欣見盛典聲諸詩歌
曰

嚴我祀事牲醪潔馨升降揖拜於山川后靈壇壝肇置
有齋有庭

惟后稷氏播種百穀食我活我壇而不屋萬世民生永賴是育

曰風曰雷曰雨曰暘弗忘於時嘉穀穰穰迺積迺倉惟邦家之祥

冠服整肅沐浴外宿昧爽禮行弗諂弗瀆幣實於篚鞠躬致告

伐鼓彭彭撞鐘鈞鈞神人以和鼓瑟吹笙法古用今祀事孔明

雙檜

七章三章章六句四章章八句

昔宣聖手植雙檜今五十五世孫謙夫之父再植於
東魯齋復為圖為文豈惟昭厥美所以示不忘也華
陽舒頤聲諸詩曰

巍巍雙檜植自東魯既培其根亦沃其土伊誰之功實
自厥祖

雨露所濡童童車蓋蔽覆萬夫聖德之大爰洎子孫綿
千百代

宣尼所植千有餘年氣運所鍾於茲係焉枝茂繁華以
衍以延

曰惟厥考讞獄澧水詳慎恤刑卒於官所母挈孤子寄
食秋浦中經亂離誰其念險阻

天相厥子承於休陽思檜斯植思考斯揚東魯東齋惟
耿有光承迺祖迺父示子孫毋忘

於皇厥祖纘周文武仰高鑽堅亦孰敢予侮雙檜蒼蒼
與日月同光東齋煌煌垂萬世無彊

豈弟君子民之父母召公甘棠蔽芾其後惟其思之是以似之小子聲詩相期似之

芙蓉花盛開可愛

亭亭芙蓉花開向疎籬邊妖姿如美人不與春爭妍又如漢宮粧窈窕三千斯花不解語一笑何嫣然我家舊池館秋日鳴管絃賞花紛如織深夜醉花前愛花如愛人美惡人自偏但見人如花不如花年年

看書

一日不看書此心若有失看書心未已細字費目力六
經皆糟粕中有味如蜜古來聖與賢孜孜復汲汲流傳
百世下相見不相識今人不如古古人豈今日時還看
我書撫卷三歎息

賦詩

一日不作詩此心成渴想非關賤性癖只為薄伎癢六
義起商周漢魏相倣倣下迨唐宋交聲韻迭清響於焉
觀治亂豈直事標榜窮幽與廣達俱屬浩氣養何當搜

神奇後世知音賞

節飲詩

并引

夫酒適興而已名曰歡取其樂也詩興眉壽之歌書
載沈酗之戒皆不欲其過於飲也故大禹之所惡
靖節之所止莫非此意雖然宣其湮鬱陶其和氣非
此生其誰歟於是賦節飲一章惟諸公其斟酌之幸
母曰寡情

麴生乃狂藥大禹惡其旨古人慕玄味其中有至理我

觀栗里翁不醉日不已悟世若大癡茲焉名譽起後來
效酺醕顛倒世間子予生無大量沉酗非所喜蛙腸與
龜腹能容幾何爾青州號從事真人呼白水騎鯨仙可
期荷鋤死不耻適興與追懽豈在昏昏裏揖謝糟丘生
遠汝幸勿鄙

古松

偃蹇歲寒姿盤屈當虛樗蒼皮絡紫蘚翠色搖青冥中
藏六月雪下伏千載苓酷暑亦何畏隆冬愈加青老骨

存蛟龍繁枝庇林垌不幸失所依流禍延丙丁恩深感
雨露猶足揚王庭天風西南來慎勿驚山靈

寄胡季和姪

龍鬚高插天石壁削蒼玉中有偉人居琴書樂幽獨昔
經喪亂餘俯仰幾不足先君儒者師教食玉山祿之子
溫溫姿以道訓家塾散慮臨清溪陶情玩脩竹常懷老
杜憂復效長沙哭客至輒開尊脫略外邊幅舊物遺青
氍願言繼芳躅

木槿

愛花朝朝開
憐花暮即落
顏色雖可人
賦質無乃薄
亭亭映清池
風動亦綽約
彷彿芙蓉花
依稀木芍藥
炎天衆芳凋
而此獨凌鑠
慰目聊娛情
蒼松在巖壑

白槿花

素質不自媚
開花向秋前
澹然超羣芳
不與春爭妍
涼夜弄清影
縞衣照嬋娟
佳人分寂寞
零落祇自憐
鮮鮮碧雲樹
皎皎萬玉懸
朝開暮還落
物理乃自然
咄彼壘

腫木徒爾全年

綠照亭

亭亭登源山上有綠照亭下瑩百尺潭樹木冬夏青官
僚時登眺毛髮亦洞照不用投以膠肝膽自同調許侯
登科人胸次藏經綸又似亭下水清徹無與論

晚節亭

結亭山之阿而以晚節扁相期歲寒心松菊託深巖老
翠鬱嚴冬寒香護蒼蘚不競桃李華日乃荆棘剪幽人

壽而康營窩巧如繭有詩時復吟有酒聊自遣願言百
世孫努力各黽勉

七佛菴三十韻

春色如多情陰雲貸遊矚登臨不憚勞踣踣轉山谷石
磴危欲敝梯身進恐復松風響簫笙花露滴巾幅鑿鑿
石齒連盤盤山脊伏初疑路不通似覺地可縮小憩林
木深大觀天地育曠胸陵八荒舉手決四瀆歲暮歷險
艱時危事幽獨情深山水佳興遣杖屨復七佛菴先登

一人泉可掬誓將寂滅心受此清淨福塵世徒喧嗽山
門遠榮辱艱難慨諸僧落莫栖老屋江水清入懷淮山
翠凝目花陰覆層簷鳥語隔幽竹稽首幡幢翻升階路
徑熟禪心絮沾泥世味螭煮粥軍政期嚴明民風慕清
穆既興楊朱悲復動賈生哭再上講經臺仍摳御風服
憑高氣層層眺遠山轟轟石眼松落根崖腰樹飛瀑一
泓照鬚眉兩地映蘭菊骨蛻超塵累悟空信機軸無心
雲自飛得趣景何倏綠樹啼白猿青莎卧黃犢川原豁

而開麻麥蔚以蓼遊辰風日和行徑花草馥冥冥鶴歸
來長笑下山麓

送何子舟征官秩滿

友朋情若何最苦是離別親愛不忍舍臨歧語嗚咽官
遊南北州江海多隔越為官不必高飲酒不必冽寬厚
長者心剛強見中輟所以甘棠陰千載稱召伯

懷秋浦

我昔客秋浦竊食居芹宮朝遊望京門莫宿齊山東看

花拂曉露騎馬踏春風稽首昭明祠香火千古崇釣魚
池尚在讀書臺已空當時不知幾亦墮元惡中辛勤注
文選休名照蒼穹

暮秋彌月陰雨薪米甚艱晚霽至夜復雨

黃昏天開霽夜黑雨後作天公亦侮人稔歲變凶惡濕
薪炊午庖生稻炒晨鑊十日九陰雨何處散吾脚况味
固不佳光景亦蕭索孰云歲功成尚乃滯耕穫倩誰開
扶桑四海照一爍

子恭凌君仲冬回冷校居講下醵杯以慰岑寂杯

餘偶成

有客美髯子飄飄雙溪來手持青芙蓉笑索梅花開語
寄宣城謝句詠都官梅日南見子月征途雪皚皚一官
勿謂冷官熱非其才吾道欣有託願言且徘徊將何慰
岑寂時共陳尊壘

用前韻

俗子推不去可人期不來芹宮有佳士豁達襟懷開緬

想客秋浦醉弄清溪梅相別十餘載鬢邊白皓皚雲霄
走俊彥山澤遺英才韞櫝諒有待因時暫徘徊雖無細
腰舞何妨酌金罍

耕隱堂

張生梓嘗從遊乃祖重五氏有堂扁耕隱索題咏遂
賦之

扶犁出東郊適值春雨足布種宜及時日至皆自熟村
後數畝田村前三間屋賦稅早了輸勉勵免孫讀從渠

食萬錢任彼學干祿官守言責無睡覺日晒腹

雜興

種秫無一頃誅茅擬三間詠歌衡門下心與孤雲間投竿傍遠水採藥歸名山忽見雙白鳥飛去時飛還南澗水泠泠東村月灣灣豈無一樽酒獨酌開歡顏

述事

鷹鷂務擊搏鸞鳳尚文采鳳子久不來鷹鷂抱饑餒狐兔滿郊原背爪今安在朝廷急賢才彼乃富於賄田里

聲嗷嗷朝夕不可待
況彼亦惟難茲焉尚不悔
斯理將奈何吾將扣真宰

立春

三陽肇開泰一氣回新和
百卉已萌茁光風扇晴波
田疇入鋤犁城郭仍干戈
而我抱鬱鬱居焉萬山阿
忘言今古事叩角時悲歌
治亂闕氣化世情今如何
悠然出山去天濶浮雲多

春陰

昏昏霧隱山
冪冪雲弄水
造化如妬春
又釀明日雨
尋芳未可期
息戰乃所喜
花淚愁闌干
柳眼眠未起
昔日繁華衢
茲焉變荒址
將何測陰陽
默默數甲子

夏夜

飛螢委露草
宿鳥驚風枝
河漢耿玉宇
東星忽西馳
幽人澹無寐
起問夜何其
桂樹影婆娑
照我鬚與眉
人生無百歲
歡樂幾何時
有酒且盡醉
長歌歸來兮

次王和夫避世八都

生平性放曠處世常淡然但恐學未至讀書究其玄時
經喪亂際嚮慕心益堅仰睇高飛鴻翱翔入雲烟云何
雜燕雀下與雞鶩連避謗去城市尋幽適林泉枕流夜
雨歇坐石春風顛徒抱心耿耿復憂腹便便王君我畏
友時寄五色鮮神鬼泣老筆風雪走長篇文章古所貴
道義今誰傳將謂禮樂盛遽罹干戈年六經既掃地一
物安得全藉甚右軍裔榮讓諸郎先依山更帶水問舍
仍求田花下鹿濯濯雲間鶴翩翩情懷渺何許風月渾

無遣尊酒何時會醉賡雲錦箋

中秋對月無酒悵然孤吟

對月惜無酒悵然負良宵而我鬱此居時世居無聊舉
頭問明月桂影東林高南箕粲黃道北斗橫青霄澹泊
固常事佳辰何寥寥酒賞明月盤中乏羶腴何如待
九日醉約柴桑陶

代喻景初送王仲才秩滿升廬州府史

亭亭九華山熒熒青芙蓉鬱鬱鍾間氣挺挺生材雄王

君為時彥置身簿書叢分祿來淮西逢人說江東無為
富魚米頻年屢興戎奸貪互殺伐來往青與紅想當官
府初十室九已空稅賦且缺畧況乃軍需供龐然雜羣
處憤憤如盲聾承王奉王命御下悲下窮亂離慎所處
襟懷自春容一朝書上考行李何匆匆擢發秀溪月帆
掛巢湖風廬州古名郡地衍當要衝似聞太守賢才美
皆升庸況復薇垣臨恐是夔與龍會當騰踏去仰羨孤
飛鴻

草堂文遠長老

草堂爾何靈占此清淨境
緬想齊梁間談空效甲丙
迄今七百載愚谷昧究省
晚結文遠交參悟若脫穎
燈燈續長明院院慨清景
粵自兵革興林泉息孤影
源澄江湛波眼淨雪冒巔
幽幽居其常擾擾觀以靜
澹然方寸間一切事俱屏
願開了了心下界洞光同

贈幾上人

上人本忘機機鋒觸處有
寂然不動時天地懼掣肘玄

機近如何無語對蒼狗機心不可忘用機成矯揉不停
惟天機烏兔迭飛走有時機忽萌光芒射牛斗慮恐不
見幾枯坐如木偶誰能參我機直把命根剖我機未易
參請看三緘口九年面壁坐解得此機否談空未是空
類朽元不朽機闢識得破自家才放手笑輓北山雲是
我無心友

頭陀廢寺

微雲漏疎雨春事將結束小徑敷落紅長條已栖綠行

行叩禪關寂寂敲老屋犬吠知來客巖栖見僧獨漣漪
漾方池青蔥鬱佳木立教雖尚空存心未脫俗於世竟
何裨零落歸山谷極樂迷羣生無生惑三竺風光慰羈
人聊此寓遊目

暑夜

火雲夜不卷老汗如流漿展轉復展轉披衣趣風涼仰
觀紫微垣列宿森四傍分布各有位中天垂光芒如何
久離間使我獨徬徨紛紛熱惱者跨海無津梁

春曉

月落牕未曙
隣雞再三啼
攬衣起徘徊
傍水鳴鷓鴣
水未霧氣薄
花梢露華低
晨光一開豁
照耀東與西
隔屋鳥語碎
叫雲鶴聲齊
治生不可緩
童僕勤鋤犁
春曉最清淑
竟作春曉題

宿興福寺

金仙渺何許
老樹護法堂
臺殿月正高
風鈴語丁當
自從入中國
妄誕驚愚狂
咸謂極樂國
遙遙在西方
血氣

人所鍾有生必有亡胡乃不自覺於焉慕荒唐頂禮三世尊我心多妙香三千世界中物物被德芳忽然稻花雨散作先秋涼

雜興

颯颯風已動霏霏雨將來溝塍水溢滿晚稻花齊開黃鵠遡雲漢青蠅集蒿萊流光倏云邁瑞氣何當回寓目且如此長吁上高臺

二

火流母金伏涼颺迎蓐收斗柄指西南銀河界夫浮鴻
鴈沙溪來稻粱豈身謀尺書繫其足關塞當高秋上言
安邦策為解倒懸憂寸心抱耿耿羣飛日啾啾

三

五雲宮闕高萬里不可到振羽欲奮飛剛風蔽前道草
蔓日已滋邦國日益耗變理者何人調和未深造堂堂
賈長沙虛負夜半名時世今何如吾將問商皓

微雪喜晴

愁雲起層層大雪落板板北朔號枯桑須臾眩吟眼阜
凸恍若堆地凹忽疑剗紅圍麒麟爐綠汎琉璃殘朋友
各遠居相邀愧書簡九天卷層陰八極開微暎

憶邊

良人久從征關河音書絕莫念閨中情所貴保貞節妾
心明如鏡君心皎如月明月照萬里青鸞惜離別綠牕
起遲遲惆悵櫛短髮願將明月心長夜照天闕慎勿生
遠愁從渠自圓缺

贈星者吳子椿齡

偶來翬山陰數日雨不止出門送春去香泥濺雙履
我巾者何人云是儒家子手持十二曜開口斷生死
我今已白頭亦是湖海士王門曳長裾相府掛名字
不辰逢搶攘林下且如此問茲復何如嗒然笑不已
死生固有命修短順天理顏蹠不同途壽夭未可擬
臨風叫君平成都幾千里

俞舜欽遷居城西

闌闌結華構軒牕豁虛敞山光映層疊雲影互來往攜
書教子讀坐待明月上英風慕謝玄習氣類任昉種菊
依雲根掩闌謝塵鞅青囊秘典竒白屋多景仰平生湖
海心慷慨惡寸枉彼此愛桐鄉今古意相倣騰裁竹滿
林恐是三徑蔣

亭子

樹老泣寒雨巖空號暮風豈無一尊酒為我澆曠胸夜
夢生羽翼孤飛廣寒宮玉皇香案側窈窕雙女童再拜

辭懇切俯伏陳愚衷飄然跨白鶴言笑超鴻濛

贈縣丞臧起潛赴京十二韻

魯山好家世累葉孫枝賢潛也甚俊逸詩思如湧泉去
歲道吾邑之官上黥川今年大府委押運百萬錢會稽
古多士山水尤清妍君才如繭絲抽繹不斷牽酣歌發
天葩落筆數十篇字畫倏變化縱橫類張顛為政尚文
質不負朝廷銓安得數十輩郡邑熙熙然驅車南京道
木脫霜滿天寵渥列近侍願託冥鴻傳

前山寺 並引

予自上田回山莊過前山寺訪秀山主因登後隴時
雪初霽見前村一帶人家蒼松翠竹殘白掩映宛如
畫圖中惜不能呼起顧虎頭為予着筆乃為之詩

登眺見殘雪璀璨東西家點綴松與竹又如三春花
樞衣陟崔嵬一日窮天涯霽色豁林麓新歲宜桑麻於時
冬告闌天地寒彌加冰沍山下泉漸泊溪中沙老僧撥
寒爐旋煮雪水茶澹泊生智慧蕭條勿咨嗟我生星失

躔負此兩鬢華勲業上竹鮎歲月赴壑蛇萬事付一嘅
仰羨投林鴉

齒脫

今朝一齒脫恍若孤城破動搖許多時被我獨捱過一
邊無窒碍五臟恐饑餓雖免咀嚙勞入口愛軟和空洞
亦自好堅剛乃招禍舌劍如尋常匪才直欲吐

送歐宰入武陵

秋雨昨日足秋田再生綠送君入武林高下半成熟錢

塘大都會奢麗眩人目百工競浮華衢苑紛馳逐母惑
於彼夸母憾於此辱折腰賦歸來強項仍食祿奇哉八
月潮天下惟此獨南朝百餘年故址烟草覆混瘞鎮浮
圖何物太慘酷潮頭子胥怒嶺上岳飛哭縱觀無古今
長歎有倚伏君還定何時桂月奉吟餘

閒步

和風漾晴雲約我散芒屨步出東南郊情景欣有託好
鳥鳴嚶嚶幽花澹漠漠平生江海交亂後半淪落惟餘

白髮翁林下甘寂寞眼前兒與孫懶惰不好學緬想栗
里人取醉聊自樂

石山菖蒲可愛因賦之

峻岫一拳石含蓄千丈勢蒼松封莓苔清冷貯華第婆
娑叢叢蒲籠絡根本細朝汲井底泉慨焉結交契青青
几席間勿遣塵紛翳小結山水緣娛情以卒歲

塞上歸

昨聞邊庭將斬首西北還笳鼓隘城郭愁雲暗關山白

馬載輜重側挂雕弧彎妻子迎入戶告訴衣食慳夫亦
久戰伐面黑肌肉孱有兒莫從軍至死受苦艱

朱士良紫陽讀書詩卷二十韻

昔遊紫陽山載拜紫陽翁六籍賴得註百家悉研窮四
方共推仰千載知尊崇孫枝繼芳躅結屋山之中讀誦
夜不輟吾伊聲淪淪常懷惻隱心學術軒岐攻推五運
六氣為時起疲瘡乘閒輟歌咏呼鶴攜琴童軒牕豁明
淨松竹鬱青葱移筇拂花露解纜衝溪風采藥南山北

尋詩漁梁東歸來對聖賢旨意務貫通思欲出佐理何
如裨世功思欲竭智巧何如濟羣蒙二者足名世安用
心冲冲趣與物理會景與心神融如覲者亭面如接元
理公嘯傲穹壤間斯樂將無終願授養生術復假明與
聰招邀聶許輩攜手超鴻濛

田家

龐眉老翁抱孫嬉人驚犬吠雞過籬曲屈枝懸樹架豆
梢拙火熟瓶煮糜深慚相見乏治具所憂辛苦遭亂離

我語阿翁勿內懼他年會見清平時

清明雨

雪蓀花開百五日荒阡雨暗松楸泣道途隨處白骨多
紙陌誰標酒誰瀝我家祖隴旌川南六載離亂淚空含
明朝載酒挂錢去一路海棠紅正酣

琴溪隱者


過琴溪汪胡二家相與款
予知賢而隱者乃為賦此

琴溪兩家氣誼一風俗淳龐無今昔松蘿猶有朱陳風
泉石烟霞成痼癖桃華洞口秋復春恐有漁郎來問津

轉首不知桑海變眼昏錯認商山人

舟行見漁者

河邊得魚河水煮老嫗行觴翁作主風蓬轉灣舟自行
蓬底兒孫笑爾汝廟堂任重煩謀謨安得此樂與汝俱
蕭蕭白髮秋江上悔不當時早學漁



貞素齋集卷五